

I motinitia: "Kia tonoa ki te Kai-tiaki moni o te Pihopatanga kia tukuna mai nga kante i ia ono marama, kia whai taima ai ki te whakahaere tikanga, a me whakaatu hoki te moni e tukuna ana hei kawē i te Rongopai" Paahitia ana.

7. Rohe Pariha. I whakamaramatia nga rohe o Mohaka, Wairoa, me Nuhaka. Ko te Pariha o Mohaka kei te awa o Te Wairoa te rohe.

Ko te Wairoa haere atu i reira ki Te Uhi ki Kihitu, ahu atu ki Waikaremoana me te Reinga. Ko Nuhaka, ko tua o tenei rohe tao atu ki Te Mahia katoa.

8. Nga Karakiatanga. Whakaritea ana me tuku te Taimatepara o ia Pariha ki te Hekeretari i Nepia, kia mohiotia ai nga kainga e karakiatia ana puta noa te Pihopatanga.

9. Kai-tiaki moni a te Hahi. Whakaaetia ana "kia tonoa e te Tari nga moni a nga Komiti Hahi kei roto i nga ringaringa o nga tangata kua huri ki te whakahaere a Ratana, a kaore e whakaae ki te whakaputa mai i aua moni.

10. Kura Ratapu. I ata whakahaeretia tenei take, a kitea ana, he nui nga takiwa kaore he kura-Ratapu. Ko te mate he uaua no te kitea he tangata tika hei kai-whakaako mo aua kura. I whakahau te tiamania kia kaha nga Pariha ki te whakatu i nga Kura-ratapu hei maramatanga mo nga tamariki.

11. Nga Kai-karakia. I tirotirohia ano te rarangi o nga Kai-karakia, me te whakauru i nga mea hou, me te tapahi i nga mea kua mate, me nga tangata kua whakarere i te mahi.

I tono a Rewi Tamihana kia whakakorea tona ingoa. No te tau 1872 i tu ai ia hei Kai-karakia a tae mai ki tenei wa. Ka 55 nga tau ona e whaka haere karakia ana kua kapo haere ana kanohi, noreira e tono ana kia mutu ia.

He nui te mihi o te hui ki a Rewi, mo tona kaha, me te pumau o tana hapai i te Hahi. E maharatia ana ko ia pea te Kai-karakia i penci rawa te maha o nga tau e tu ana, o Niu Tireni katoa.

Kaore te hui i whakaae kia mutu ia, engari me okioki i nga wa e hiahia ai ia.

12. Nga Rawiri me nga Himene. I whakaaturia kua whai Rawiri, Himene, Paipera te tari o te Pihopatanga, mo nga tangata hiahia ki te hoko i era pukapuka.

13. Himene. I whakaritea ko Peneti raua ko P. H. Tomoana hei komiti kahi haere i etahi himene hou hei apiti ki ta tatou pukapuka Himene.

14. Himene me te "music." I tonoa e te Hui kia tuhituhi a Atirikona Hapata ki Ingarangi patai mehemea ka taea te perehi mai o te music mo nga himene Maori.